

Ina funtauna d'inspiraziun

■ (mp) **Sco usità è vegnida preschentada a Domat era la nova Litteratura, la publicaziun da l'Uniun per la Litteratura Rumantscha. Ella tracta il tema da «Gea e Na».** L'illustraziun da la cuverta da la Litteratura 33 mussa, a maun dal purtret da *Peter Wenzel*, che la problematica era gia preschenta tar Adam ed Eva.

Decisiun vitala

Las duas redacturas *Aita Dermont-Stupan* ed *Uorschla Natalia Caprez Brühlhart* han preschentà il cuntegn da la revista precisond che la litteratura di gea e na e na fa betg decider be per l'in u l'auter. «Cun acquistar la lingua emprenda l'uffant pitschen l'impurtanza da savair dir na», ha menziunà *Aita Dermont* mussond vi sin in text da *Barbara Zollinger*, translata dad *Ursula Brändli Capaul*. Pli filosofica è la contribuziun dad *Iso Camartin*. *Uorschla Natalia Caprez Brühlhart* ha explitgà che per *Camartin* sajan quai decisiuns essenzialas da la vita umana. *Göri Klainguti* tematisescha las nianzas ch'i dat en il discurs per dir gea e na. Il tema da l'onn tractan anc auters auturs, tranter dad els

plirs giuvenils e quai en furma da poesia, prosa ed essai.

Ulteriur cuntegn ed illustraziuns

Sper la part principala cun il tema surmenziunà cuntegna la Litteratura 33 anc ina ritscha da texts da different gener. Sper las emprimas poesias rumantschas dad *Angelika Overath* datti da leger ils slogans umoristics, ironics ed impertinents che la Lia Rumantscha ha stgaffi en connex cun l'exposiziun a la Higa ed anc autras delicatezzas. In chapitel è deditgà a la memoria dad *Oscar Peer*, en il qual plirs auturs sa regordan dad el. Ina dedicaziun, ina recensium ed in'intervista cumpletteschan questa revista. La publicaziun da la «pagina» (texts prelegids l'onn passà) tiran endament il tema dals Dis da litteratura da quest onn, numnadamain retrorumantsch. Ils squitschs en color da *Laura Bott* interrompan da moda fitg agreabla ils differentes texts. *Uorschla Natalia Caprez Brühlhart* ha terminà la preschentaziun cun dir: «Qua èn munds che spetgan be da vegnir scuvrids. Els èn ina funtauna d'inspiraziun.»



Aita Dermont-Stupan ed Uorschla Natalia Caprez Brühlhart cun la Litteratura 33 ch'ellas han cumpilà.